

il morurent, les autres font ardoir les cors. Et encore voz di que quant cesti ydres sont portés de lor maison au leu o il doivent estre ars entre voies en auquant leus, les parens dou mors ont fait emi la voie une maison de fust coverte de dras de soie et de dras doré. Et quant le mort est porté devant ceste maison si aornés, ils s'arestent et les homes gitent devant le mors vin et viandes assez, et ce font-il por ce que il dient que à tiel honor sera-t-il recevu en l'autre siècle; et quant il est aportés au leu où il doit estre ars, ses parens font entaillier homes de carte de papir et chevaux et gamiaus et monete grant come bizans, et toutes cestes couses funt ardoir avech le cors, et dient que en le autre monde le mors aura tant esclai et tantes bestes et tantes moutons com il font ardoir de charte. Et encore voz di que quant le cors sont porté à ardoir, tuit les stormenz de la tere vont sonant aunte (devant) le cors. Et encore voz di d'ounautre chousse, que quant cesti ydres sont mors, il mandent por lor astrolique et dient elz la nasion dou mort, ce est quant il nasqui, de quel mois et quel jorno et l'oire; et quant les astroilique le a entendu, il fait sez endevinaile por arz diabolique, et dit puis qu'il a fait sez ars, le jor que le cors se doit ardoir. E voz di que de tielz fait demorer que ne l'ard une semaine, et de tielz un mois, et de tielz six mois, et adonc convient que les parens dou mort les tegnent en lor maison tant con je voz ai dit : car il ne firoient jamès ardoir jusque atant que les endevinz lor dient qu'il soit bien ardoir. Endementier que le cors ne s'arde et demore en lor maison, le tenent en tiel mainere, car je vos di qu'il ont une cassie de table grosses un paumet, bien conjunte ensenble, tote enpointe noblemant, et hi metent le cors dedens, et puis le covrent de tielz draz et si ordré et con canfara et con autre espèces que le cors ne poute point à celz de la maison. Et encore voz di que les parens dou mors, ce sont celz de la maison, ongne jor tant quant le cors hi demore, li font metre table et hi metent viande da mangier et da boir ausi con c'il fust vif, et le metent devant la cascio où le cors est, et le laissent tant come l'en pense avoir mengiers, et dient que s'arme menjue de cel viande. En tel mainer le tenent